

## Hikai lekhuid ha ETC, Nongsder bad Umlatar katkum ka Swachh Bharat Mission

**NONGPOH, Nohprah 05:** Ka jinghikai ban leh khuid ban pynim ia ka thong ba ka Sorkar India bad ka jylla ki kwah bad thrang ban pynurlong ia ka Swachh Bharat Mission ka la nang iai bteng ha kaba ka Extension Training Centre (ETC), jong ka SIRD, Nongsder, Umiam, Ri-Bhoi district, ka la pynkut noh ia ka bynta jong ka na ka bynta une u snem 2014 ban (Bteng sla 7)



Ki dkhot VEC, ASHA bad Anganwadi lem bad ka RAWA bad ETC katba ki dang pynkhuid ia ka phyllaw ha Mawphlang C & RD Block (KJ)

## Hikai lekhuid ha ETC, Nongsder bad Umlatar katkum ka Swachh

ai jinghikai kaba bniah sha ki dkhot ka VEC, ASHA, Anganwadi bad ki CBO, kaba la long naduh ka 3 haduh ka 5 tarik mynta u bnai.

La ioh ia ka jinghikai na ki nonghikai bapher bapher ba kynthup ia u Bah O.B Rane, Director RAWA, ba la shim bynta ban hikai halor ka Sharing Experience/Communication Skills, ka Kong S.K Bani, CHO, Umsning CHC kaba la hikai halor ka Domestic Sanitation & Food Hygiene, ka Samla Natalyne Shangpliang, BSc Nursing, kaba la hikai shaphang ka Personal Hygiene/Community Hygiene, ka Kong G.S Lyndem, Principal ka ETC kaba la hikai halor ka Swachh Bharat Mission, ka Kong Sara Rumnong, AF, NRHM, Umsning CHC kaba la hikai halor ka Role of ASHA, Anganwadi, Social Worker on Sanitation.

Hadien kata hymnin ka Sngi Palei la pynkut shuwa ia katei ka jinghikai ha katei kajuha jaka ha kaba la ioh ia ka jinghikai na ka Kong Alvareen Shangpliang, District Coordinator ka SBM, Ri-Bhoi district halor ka Solid & Liquid Management, la bynrap biang da u Bah O.B Rane halor ka Communication Skill bad hadien kata shiteng sngi la pynlong ia ka jingleit jngoh ia ka ophis u BDO ha Mawphlang bad la pynkhuid ruh ia ka phyllaw jong katei ka ophis da ka jingshim bynta shitrhem ki nongshim bynta da ki dkhot VEC, ASHA, Anganwadi bad ki CBO ba la ialam da ka ETC bad ka RAWA.

La pdiang sngewbha ia baroh kiba la wan sha kane ka jingjngoh ia katei ka ophis u BDO ka Mawphlang C & RD Block da u BDO jong ka, u Bah D Syiemiong, uba la ai mynsiem bad kyrkhu lang ia baroh kiba la wan sha katei ka prokram bad pynshlur ia ki ban hikai lem ia kiwei pat ban lekhuid ha ki shnong ki thaw, ki iing ki sem bad kumjuh ruh shimet shimet.

La bteng biang ia kane kajuha ka jinghikai hynne ka Sngi Thohdieng ha kaba ka RAWA ryngkat bad ka tnat PHE na Umsning Sub Division ki la leit ban jngoh bad ai jinghikai ha ki paidbah ka shnong Umlatar, jan Mawhati, Ri-Bhoi district.

Ha kane ka prokram ai jinghikai lekhuid, la sdang da ka jinghikai shaphang ka kamram ban lekhuid lyngba ka Kong Alvareen Shangpliang, bud nangta sa ka jinghikai shaphang ban pynneh pynsah ia ki dieng ki siej da u Bah W.S Nengnong, NBA, SA, PHE, Umsning Sub Division, nangta na u Bah B Blein, JE ka PHE, uba la hikai kumno ban lum ban lang ia ki jaboh kiba pyut bad ki bym pyut.

La ioh ruh ia ka jinghikai ban thet kti ne sait kti lyngba ka Kong Victoria Sohphoh, la ioh ruh ia ka jingkrean kumno ban lum ban lang ia ki plastik jaboh bad thep ha ki khoh ne shang ne ha ki tin ba la thoh USE ME da u Bah E Lamo, SA ka tnat PHE, la ioh shuh shuh ruh ia ka jinghikai ban shna bha ia ki paiñkhana lyngba u Bah O.B Rane, uba la hikai bniah ban shna ia ki paiñkhana kiba katkum ka juk ba mynta, ban lait na ka jingwan boi u skaiñ uba ju kit ia ki jaboh eit briew ha ki kjat jong u ban her sha ki pliang ja ki briew kaba bunsien ki briew kim lah lait na ka jingbam eit ha ka por ba ki bamja.

Khatduh eh la ioh ia ka jinghikai kaba bniah na u SDO ka PHE, u Bah P.S Lyngdoh, uba la kren pdeng lut ia baroh ki jinghikai ba la ioh ha kane ka sngi bad u la pynshlur ia ki paidbah katei ka shnong ba kin bud ia ka nuksa kaba bha kumba ka sorkar ka kwah bad thrang ba man la kawei pa kawei ka longiing ki dei ban pyntikna ba kin don ka paiñkhana kaba khuid bad kaba pyndonkam da ki jingtap kiba biang bad ki jaka leitbar kiba katkum kane ka juk ba mynta bad kim dei ban bret pathar ia ki jaboh jabaiñ, khamtam ki plastik jot bad ki mar ba la pyndonkam.

U la ong ruh ba ka dei ka kamram jong man la uwei pa uwei ban ieid ialade da kaba sdang shuwa nalade ban lekhuid, nangta bud sa ka iing ka sem bad hadien kata ka shnong ka thaw baroh kawei.

Ha kane ka jingialap lekhuid, la ioh ruh ia ka jingrwai lyngba u Bah C.G.R Syngkli, shaphang kane ka phang ban lekhuid ha kaba la ai khublei ruh da u Bah Rane bad u Bah Lyngdoh lem bad ki ophisar na ka tnat PHE ka Umsning Sub-Division.